



Inuussutissanik allagartalersuisarneq pillugu Namminersornerullutik Oqartussat nalunaarutaanni nr. 1-imi, 2. februar 1994-imeersumi § 11 imm. 2 nummer 1-ip allanngorteqqullugu Naalakkersuisut peqquneqarnissaanik Inatsisartut aalajangiiffigisassaattut siunnersuut, nalunaaqutsersuisarneq aamma tuluttut pisinnaangortillugu.

(Inatsisartunut ilaasortaq Steen Lyngge, Demokraatit)

(Siullermeerneqarnera)

Aallaqqaammut Inatsisartunut Ilaasortaq Steen Lyngge qutsavigerusuppara aalajangiiffigisassatut siunnersuutaa manna pillugu

Demokraatiniit kissaatigaarput innuttaasut nammineq akissarsiaminnik sapinngisamik amerlanerpaanik sinneqartassasut. Matumani saqqummiunneqartutut nunatsinnut inuussutissat allagartalersorneqartalernissaat immikkut aningaasartuutitaqartussaavoq, skandinaviap avataaniit tikisinneqarsimappata, amerlasuutigullu ajoraluartumik nioqqutissat atuisartunut akisunerulissapput. Tamanna ajornanngitsuaqqamik iliuuseqarfigisinnaavarput, tassa siunnersuutip matuma akuerineratigut.

Nalunngilarput amerlaqisut misigisimasartut nioqqutissat akisuallaartut tamatumunngalu manna akisutitut ilaavoq. Ullumikkut nunatsinnut eqqussuisorujussuuvugut.

Siunnersuuteqartup saqqummiussaa ilumoorpoq. Oqaatsit eqqarsaatigalugit ullumikkut paasisimasaqarnerulernikuuvugut. Ullumikkumut naleqqiullugu akikinnerusumik periuseqartariaqarpugut. Taamatut allannguinnikkut Kalaallit Nunaannut nioqqutissanik eqqussuisartut eqqussuisalerumaartussallu akornanni unammilleqatigiinneruneq pilersissagaluarparput. Naggataatigut innuttaasunut iluaqutaasumik tamannaannginnerlunimi maani issianitsinnut pissutaasoq?

Takusinnaavara Naalakkersuisut allamik isumaqartut. Uaguunngitsorli. Misissorusunngilagut aamma misissuerusunngilagut uunga siunnersuummut tunngatillugu, iliuuseqarusuppugut - taamaattumik Naalakkersuisut allannguutissatut siunnersuutaat itigartipparput inassutigalugulu siunnersuutaqqartoq akuerineqassasoq.

Siunnersuut Inuutissarsionermut Aatsitassarsionermullu Ataatsimiititaliamut innersuupparput.